

La Lettre Jèrriaise .

Bouôjour, ch'est Ken Vibert dé Grosnez tchi vos présente la lettre Jèrriaise aniet lé 19 dé Juîn 2021.

Comme tchiques-uns d'vous l'savent bein, y'a un groupe de gens tchi s' rencontrent ensembl'ye lé Vendredi au matîn pour distchuter en Jèrriais. J'sommes entre dgix et vîngt d'nous tchi s' rêunissent à Jersey Pearl, au but d'la Grande Route des Mielle, ou comme bein d'vous l'ont connue toute vouot' vie "La Route des Cinq Miles". Atout un café jé r'pathons touos les maux d' la vie, dithant tréjous qué j'pouôrrêmes faithe bein mus qu' les êlus tchi sont dans nos États. D'aut' fais j'pâlons du temps pâssé, ou comme l'aut' semaine d' la pêque. Ben Spink, qu'ou connessiz bein car i' vos a présenté la lettre Jèrriaise plusieurs fais, nous dit tch'il' avait arrangi aue un anmîn pouor am'ner sa mousse à basse ieau, pouor li' explitchi lé dangi, mais étout lî montrer tchi qu' nou-s'-y trouve dans les mathes et souos les gallos. I' nous dit tch' il' eûtent bein d'la chance car il' y trouvîtent un honmard et même un ormer. Ch'est r'merquabl'ye comment qu' nou peut s'ramémouaither dé bein des choses tchi s'arrivîtent quand nou 'tait mousse, et j'lus racontis l'histouaithe dé man grand-grand-pêthe Douard Le Feuvre tchi faisait la pêque. Il' avait un baté pêcheux d'treize pids bordé à clyin, tch'i' gardait au bas d'la falaise à La Cotte à la Chèvre tchi s' trouve entre La Grève au Lanchon à Pliémont et les ruines du Chaté d' Grosnez. I' pêchait aue son vaîthîn et bouan anmîn Ph'lip Gallianne et j'mé rappelle quand

j'tais tout mousse, j'avais pon pus d'quatre ou chîng ans, d'aller aue ma grand'méthe les vaie. Il' avaient touos les deux pus qu' septante ans mais il' allaient acouo faithe la pêque ès Mintchièrs. Comme i' n' y' avait pas d'engîn dans son baté i' fallait d's avithons pour lé faithe nagi. I' m'ttaient huit heuthes pour y' aller et dgiêx heuthes pour èrvénîn avec lé baté chèrgi d' païssons, auprès deux ou trais jours dé pêque là-bas. Aue ma grand'méthe j'allions nous assiêthe sus un grand gallot au Chaté d' Grosnez pour les vaie lus écarter d' la falaise pour trouver les couthants tch'allaient faithe lus avithonnage bien pus aîsi. J'restions à les dgetter jusqu'au moment qu' nou n' les viyait (pon) d'autre.

Ma grand-grand-méthe, tch'avait fait lé caltchul bein des fais nous dit quand tchi qu'il' allaient èrvénîn, et à tchi moment qu' nos aller les r'vaie. Avec ma grand'méthe j'èrtouônnions au Châté aue eune longue veue pour les vaie rappréchi d'la côte. Eune fais tch'il' avaient pâssé la pointe du Châté, j'nos en r'vînmes au haut d'la falaise en d'ssus d'l'amathage. Dé là, j'pouvions les r'garder prendre lus pouque à païssons sus lus dos et monter lé c'mîn d' pid tchi monte la falaise. Et j'vos asseûthe qué ch'n'est pon aîsi à monter même sans eune poutchie d' païssons sus l'dos. I' 'taient solides ches deux vièrs pêcheurs, et achteu qué j'sis du même âge qué ieux, j'sis bein seux qué jé pouôrrais janmais en faithe autant. Et bein, mèrcie d'm'aver êcouté, et à la préchaine.